

Lonevåg 20.05.2021

MERKNADAR TIL PLANFRAMLEGG OMRÅDEPLAN LONEVÅG

2. GONGS HØYRING

Vedkomande faktaopplysningar i saka syner ein til merknadar frå Lonevåg Båtlag i samband med 1. gongs høyring som journalpost nr 20/15262 til planframlegget. Ein viser også til skriv frå båtlaget av mars 2021 som er lagt ved som vedlegg til desse merknadane.

I samband med at planframlegget no er lagt ut på 2. gongs høyring vil båtlaget koma med følgjande innspel og merknadar:

Det er fullt mogleg å vidareføra småbåthamna i område VFS (indre hamn) i områdeplanen og samstundes peika på Barkavika (område VS) som framtidig småbåthamn. Det er no ingen ledige båtplassar i eksisterande flytebyggjer i Lonevåg, og Lonevåg Båtlag har antyda i skriv til kommunen 28.03.2019 forventa trong for 35 nye plassar innan 2025 og ytterlegare 25 plassar fram mot 2040. Saman med eksisterande 26 båtplassar ved Gunnebo Anja er det då trong for meir enn 80 båtplassar i tillegg til dei omlag 60 plassane som i dag er lokalisert i indre hamn. Lonevåg Båtlag ønskjer å medverka til å realisera framtidig småbåthamn på Barkavika saman med andre offentlege og/eller private aktørar, men på kort sikt er dette ikkje realistisk når ein tek omsyn til kostnader knytta til infrastrukturar og tilrettelegging for eit slikt prosjekt.

Ein vil også peika på at vidareføring av småbåthamna i indre hamn (område VFS) kan gjerast utan å koma i konflikt med generell tilgang til sjøen for alle. Heile kaifronten ved den gamle kaien i Lonevåg er allment tilgjengeleg (bortsett frå omlag 90 cm til landfeste for landgang til flytebyggje). Det er også fullt mogleg å byggja avtrapping frå kaikanten ned mot sjøen med plass der folk kan sitja og med tilflot for mindre gjestebåtar. Lonevåg Båtlag kan og vil tilpassa posisjon for dei innerste båtplassane for å medverka til slike løysingar om ønskjeleg.

Område VFS i områdeplanen er eit nokså lukka basseng med begrensa utskifting av vatn under brua utanfor og tilførsel av ureina ferskvatn frå indre Vågatjørna. Det skjerma bassenget er ideellt til hamn for småbåtar som også bør vera eit positivt element for miljøet i Lonevåg sentrum. Alternativet utan småbåthamn er vel eit brunleg vannspeil med aukande tilgroing både langs land og i hamnebassenget.

Lonevåg Båtlag vonar med dette at småbåthamna i område VFS vert vidareført og at områdeplanen legg til rette for framtidig småbåthamn på Barkavika som kan realiserast når dei økonomiske føresetnadane tillet det.